

**Ubutumwa Bikira Mariya  
yahaye Nyiramukiza Valentine Nyiramukiza**

**Tariki ya 28 ishyira 29/09/2021  
saa cyenda na mirongo ine n'itanu za nijoro (03h45)**

*Ibonekerwa ryumwihariko*

**Bikira Mariya :**

Nyiramukiza mwana wanjye nkunda, ntega amatwi nkubwire ikinzanye.

**Valentine:**

Karame Mama, ndi hano ngo nkore ugushaka kwawe umbwire ikikuzanye.

**Bikira Mariya:**

Nje kugutuma ku basenga bemera Kristu, bemera Kristo.

**Valentine:**

Ndi hano ngo nkore ugushaka kwawe kandi untume aho ushaka no ku bo ushaka kuko ndi igikoresho cyawe n'icy'ab'isi yose.

**Bikira Mariya:**

Bana banjye ndabakunda.

Bana banjye ndabakunda.

Bana banjye ndabakunda.

Untenge amatwi yombi nkubwire ikinzanye kihutirwa.

Abasenga nimuhagurukire rimwe mutarebye idini n'icyo muri cyo, musengere hamwe musaba amahoro mu mitima y'abantu b'ingeri zose.

Musabire abayobozi b'ibihugu . Musabire ibihugu kuko biyobowe n'umwuka ukomeye w'umwijima utaboneshwa amaso ya muntu, ahubwo ukabonwa n'abuzuye urukundo ruzira uburyarya n'imitima yuzuye Roho Mutagatifu.

Mufate Rozari zanyu n'ibitabo byanyu bitagatifu ( Bibiliya) maze musabire Kiriziya n'insengero byugarijwe n'ibibazo bikomeye byihishe inyuma y'iyi misemburo yatewe abantu, iterwa abantu, izanakomeza kugeza bongeye gufunga cg gucika mu nsengero no mu miryango zanyu no mu bavandimwe banyu kandi byaratangiye.

Amasengesho rero ni yo azatsinda ibyo byose nimushyira hamwe.  
Abihayimana nibahaguruka bagatsinda ubwoba no gukorera ijisho kuko no mu mubiri wabo harimo wa mwuka ukomeye utabonwa n'amaso cyg se n'ubonetse wese, keretse uwuzuye umwuka wa Roho Mutagatifu, umwuka wera .  
Muri iki gihe abantu bose barababaye, bafite ibikomere birenze ukwemera kwa muntu. Abantu bababajwe n'ibintu byinshi: Impfu zidasobanutse kubera icyorezo n'imisemburo, uburangare bw'ababyize , kubona icyorezo mu ndwara zose abantu bakicwa no

kwiheba.

Abishwe n'imisemburo kandi batari barwaye.

Abafungwa , abahohoterwa, abazira uko bavutse, n'icyo babereyeho kugeza ubu.

Abana b'ingeri zose barababaye cyane. Abakuru b'ingeli zose barababaye cyane.

Ababyeyi b'ingeli zose barababaye cyane.

Impfubyi, abapfakazi barababaye cyane.

Abakene b'ingeli zose barababaye cyane.

Abakire bacishirije , abanyamurengwe bose barababaye cyane.

Ubwo murumva bitababaje koko? Umuti w'ibyo byose kugirango byose bitsindwe biveho burundu bizamarwa n'amasengesho no gushyira hamwe mu rukundo nta buryarya , musenga, mwiiriza , mwihana, mubabarira, mubabarirana bamwe n'abandi, mukora imyihereho aho muri hose ( Retraite).

None mwana wanjye ni ibyo narinje kukubwira byihutirwa ngo mutegure umwiherero uzatangira ku ya 1/10/2021, kugeza 3/10/2021, kuko birihutirwa cyane

kugirango mushobore gukumira inkubiri igiye kuyogoza ibintu n'abantu kandi atari nziza kuko tugiye kujya mu bihe by'icuraburindi mu mitima y'abantu no ku mibiri y'abantu .

Ni yo mpamvu mbahamagarira kuvuga aya amasengesho no gushengerera ku babishoboye. Nyabuna bya bihe by'inkundura biregereje kuri mwe musenga mwemera mu buryo butandukanye.

Muhumure mu mwiherero tuzaba turi kumwe ntihagire ikibakanga.

Ng'ibyo ibyo narinje kukugezaho mwana wanjye nkunda ngo uzantumikire ntacyo wongeyeho nta n'icyo ukuyeho kuko ibyo mvuze byose ndabizi kandi ndabireba.

### **Valentine:**

Yego Mama ndabyumvise nzatumika ntacyo nkuyeho nta n'icyo nongereye ho.

### **Bikira Mariya:**

Mwana wanjye ndagiye mfite akazi kenshi .

Ngaho vuga aya masengesho nguhe umugisha wanjye wa kibyeyi.

**Valentine:**

**Isengesho ryo kwicuza ibyaha:**

*“Nyagasani, ibyaha nakugiriye byose ndabyanze kuko binteranya nawe, bikadutandukanya ari wowe untunze ukandengera iteka, kandi ndabyangira yuko aribyo byicishije Yezu Kristu, Umwana wawe ukunda. Dawe ubinkize sinshaka kubisubira, ndashaka kuba uwawe. Amina”*

**Isengesho rya Ngwino Roho Mutagatifu :**

*“Ngwino Roho Mutagatifu  
Usanganye imitima y’abakwemera bagukunde,  
wohereze Roho wawe, byose bibe bishya n’isi izabone guhinduka.*

*Dusabe : Mana wamenyesheje abakwemera Roho Mutagatifu  
turagusaba kubwirizwa na We; gukunda ibitunganye; no kunogerwa nawe iteka, ku bwa  
Yezu Kristu Umwami wacu. Amina”*

**Isengesho “Bikira Nyilimpuhwe”:**

*“Bikira Mariya Nyir’impuhwe, wibuke ko ntawigeze kumva ko wasubije inyuma uwaguhungiyeho, agutakambira ngo umurenegere, umusabire, ni cyo gituma nkwizera. Ndakugana nkuganyira ngo umpagarareho kuko ndi umunyabyaha. Mubyeyi w’Umukiza, ntiwirengagize ibyo nkubwira, ubyumve ubyiteho. Amina”*

**“Hubahwe Imana Data na Mwana na Roho Mutagatifu, nk’uko bisanzwe iteka; bubahwe n’ubu n’iteka ryose. Amina.”**

**Bikira Mariya:**

Nguhaye umugisha wa kibyezi Kw’izina ry’Imana Data na Mwana na Roho Mutagatifu.

Amina.

Ngaho ikomereze isengesho ryawe aho warugeze mwana wanjye.

Ijoro ryiza.

**Valentine:**

Urakoze cyane Mama.

Ijoro ryiza.